

Meeqqat atuarfiat pillugu inatsisip allanngortinneqarnissaa pillugu Naalakkersuisut peqquneqarnissaannik Inatsisartut aalajangiiffigisassaattut siunnersuut, taamaalilluni tuluit oqaa-sii danskit oqaasii naligalugit minnerni aallartittumik atuartitsissutigineqartalersillugit. (Inatsisartuni ilaasortaq, Doris Jakobsen Siumut)

Akissuteqaat

(Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisoq)

Siullermeerinnineq

Tuluit oqaasiinik atuartitsinerup minnerni aallartinneqartarnissaa pillugu siunnersuummut Naalakkersuisut qujapput – siunnersuut siunnersuuteqartup nammineq erseqqissaaneratulut maani Inatsisartuni siusinnerusukkat ataatsimiinnerni arlaleriarluni eqqartorneqartarsimasoq.

Meerartavut amerlanerit atuarfimmi tuluttut atuartinneqaleraangamik allamiut oqaasiinik ilinniakkat aappaattut ilinnialertarpaat. Ilisimatusarnerpassuarni taakkartorneqartarpoq allamiut oqaasiinik nutaanik ilikkarniarnermi atuartut ilitsoqqussaralugu oqaatsitigut pisinnaasaqarluarnissaat pingaaruteqartorujussusoq.

Atuarfik pillugu peqqussutip 2002-meersup akuerineqarneratigut danskit oqaasiinik atuartitsineq 4. klassimit 1. klassimut siuartinneqarpoq tuluillu oqaasiinik atuartitsineq 7. klassimit 4. klassimut siuartinneqarluni. Tamatuma saniatigut atuarfiit allamiut oqaasii atorlugit, aamma minnerni tuluit oqaasii atorlugit nutaanik eqqarsarluni oqaatsinik ineriartuutaasunik sammisassaqaartitsisinnaanerat inatsisitigut periarfissiissutigineqarpoq. Taamatut sammisassaqaartitsinerni assersuutigalugu erinarsornerullutillu pinnguarnerusinnaasuni siunertaavoq atuartut oqaatsinit atuartitsissutigineqartunit allaanerusunik tusaanissamut misileraanissamullu sungiusarneqarnissaat.

Taamaattorli tuluit oqaasiinik atuartitsinerup 7. klassimit 4. klassimut siuartinneqarnerat atuartut atuartitsinermik pissarsiaqarnerannut kissaatigisatut maannakkuugallartoq sunniuteqarsimarpasinngilaq, tamatumani aamma eqqaamaneqassaaq iluarsaaqqinnerup immikkoortui ingerlaavartumik piviusunngortikkiartorneqarmata. Tamanna pissuteqarunarpog allamiut oqaasiinik atuartitsinissamut pisinnaassusilinnik naammattunik peqannginnitsinnik. Nunatsinni atuartitsisut amerlanersaat marluinnik oqaaseqartuupput, kiisalu kalaallit danskillu oqaasiinik atuartitsisinnaallutik. Nunatsinni ilinniartitsisut ikittuinnaat tuluit oqaasiinik allamiut oqaasiusut ilinniartitsisinnaapput – ikittuinnaanguillu aallarterlaanik atuartitsinermi tuluttut atuartitsisinnaassapput. Taamaattumik tuluit oqaasiinik atuartitsineq minnernit pinngitsoorani atuartitsissutaalissappat atuartitsisut allamiut oqaasiinik ilinniartitsinermik ilisimasallit amerlanerujussuit pisariaqartinneqassapput – atuartitsisut ullumikkut piginngisavut. Taamaattumik ilinniartitsisussaaleqineq pissutigalugu 4. klassimit tuluit oqaasiinik atuartitsinissamik neqerooruteqarniarnerup ajornakusoortinneqarnerani piviusorsioortuunngilaq fagimik siusissukkat saqqummiussinikkuinnaq atuartut inaarutaasumik misilitsinnermi angusaasa pitsannqorsarneqarnissaat.

Allamiut oqaasiinik atuartitsilluarneq ilaatigut oqaatsit ilinniutigittinneqartut atuartitsinermuinnaq pinnani ilinniartinneqartulli ulluinnarni inuuneranut pissusissamisoortumik akuusutut atortinneqarnerannik ilisarnaateqarpoq. Nunatsinni meerarpassuit oqaatsinik

ilinniartitsinertaaniinnaq oqaatsinik ilinniartarput, tassami atuartitsinerup annersaa fagikkuutaaraluni atuartitsinertut ingerlasarmat – tamannalu atuartut tuluttut danskisullu angusaasa nikerarnerannut pissutaaqataasinnaavoq. Allatut oqaatigalugu atuartut ulluinnarni inuunerminni allamiut oqaasiinik misileraasinnaangitsut aamma atuarfimmi misiliinerni misilitsitsinernilu angusarissaannginnerusarpasipput – tamannalu ilaatigut nunaqarfimmi atuartut allamiut oqaasiini angusaanni uppersarneqarpoq.

UPA 2007-imi oqaluuserisassaq 119 apriliimi Inatsisartuni oqaluuserineqarmat taamani Naalakkersuisuusut aamma uniffigaat atuarfimmi qitiusumik ingerlatsisut pingasuusut, IMAK, Inerisaavik Ilinniarfissuarlu, oqaatsinik ilinniartitsisut, atuartitsissutit atuartitsinermullu pilersaarutit pisariaqartinneqartut amigaatigineqartillugit 1. klassimit tuluit oqaasiinik atuartitsisannginnissaq kaammattuutigigaat. Taamani Namminersornerullutik Oqartussanit naatsorsorneqarpoq tuluit oqaasiinik ilinniartitsisut ilinniarsimasut 90-inik ilaneqartariaqassasut tamannalu piviusorsiuunngitsorujussuuartut naliliiffigineqarpoq.

Atuarfiup 2010-mi ukiakkut piffissap qiteqqunnerani naliliiffigineqarneranut malitseqartitsinertut kommunit Inerisaavimmik suleqateqarlutik atuartut atuarfimmi fagini fageqarfinnilu angusaannik sukumiisumik misissuilerput. Sulinermut tamatumunnga Naalakkersuisut neriuuteqartorujussuupput, tamanna ajornartorsiuteqarfinnik kommunikkuutaarineramik, kiisalu atuarfimmi atuartitsinermut immikkut suliniuteqarfissanik toqqartuineramik inerneqaqqunaqimmat – aamma allamiut oqaasiinik atuartitsinermut tunngatillugu. Naalakkersuisut neriuutigaat sulineq tamanna ajornartorsiutaasuni aalajangersimasumik anguniagaqarluni iliuusissatullu pilersaarusiortuluni suliniarnermik kinguneqarsinnaasoq, aamma allamiut oqaasiinut tunngatillugu.

Naalakkersuisut taamatut oqaaseqarlutik siunnersuutip itigartitsissutigineqarnissaa inassutigaaat.